


# MUFUNDU KU CIMANU

 Bu mudibi ne eci ndiisâtù dilòòlò, mvwa mulayè dilòòlò dishààle bwà. . . ne mvwa ne cyà kwakula, bu Mukalenge mwà kwanyisha, dilòòlò edi, pa cyena-bwalu cyà *Mufundu Ku Cimanu*. Ncyà dikèma, kaa, tudi bafwànyine kwenza mbingu pa cyena-bwalu eci, kadi katùyikù nànsha mwà kufika ciibwpi ne pampàlà pààci to. Kàdi nênteetè bwà kufilakù ànu cikòsò cyàci cikesè dilòòlò edi, ku dikwàcisha dyà Nyumà Mwímpè. Nènku mpindyewu ndi muswè kubala mu Danyèlè, nshapità mwi5 ku mvensà wa 25. Nènku Ûdi ùbadiibwa mùshindù ewu:

*Nènku mufundù wùvwà mufundùbwe ngwòwò ewu:  
MENE, MENE, TEKEL, UPHARSIN.*

Nènku mpindyewu Mukalenge àsàkidilèku mabènesha Èndè ku Dibala adi.

<sup>2</sup> Kàdi ndi ndikonka mwanèètù mwímpè, mulongolodi wa bintu byà kaaba aka, ní mmufwànyinèkù kujìma myèndù eyi. Ndi ci—ci. . . Yidi yitùma bukènkè kùneeku. Twasàkidila, ne musàngèelu wònsò. Ncyèna mwà kumòna bateeleji to. Dìbà adi pàndì ngaakula ne muntu kanà yònsò, ndi muswè kumutàngila kwìsù pàndì ngaakula apu. Bìdì bìmwèka ànu bu ne ndipetangana dyà muntu yèyè mwinè ne bantu's.

<sup>3</sup> Mpindyewu tudi tweyemena Mukalenge wetù, dilòòlò edi, patùdì ànu tuteeta bwà kwangata dîbà dyàbùngì bwà kwakula pa cyena-bwalu eci apa. Ndi mumanyè ne ncyena-bwalu cinène. Ne ndisangisha dyà butangadik-. . . cyena-bwalu eci, ne kacyi bwà dyondopa dyà kùdì Nzambì to. Kàdi cìdì bwà dyondopa dyà kùdì Nzambì dyà ditàmbe bunène. Mubidi wùdì mutàmbe kwikalà mubèèdì wùndì mumanyè dilòòlò edi, m'Mubidi wà nyumà wà Mukalenge wetù Yesù, pa buloba ebu; mutàmbe kusùnsula, mupandùlùke mu mùshindù wà ne wùdì cyà bushùwà dijinga ne dyondopa dyà kùdì Nzambì.

<sup>4</sup> Mpindyewu, cyena-bwalu cyètù dilòòlò edi cìdì cìbangila mu Baabùlòna. Ne Baabùlòna ùvwà ùsanganyibwa dyàmbedi, mwinè mùcìdiyè ànu, mu Shinear. Ne ùvwà ùbìkidiibwa dyàmbedi ne, “ciibi cyà Nzambì,” *Babel*. Babel, ne pashìishe kubìkidiibwayè ne *Baabùlòna*, cìdì cyùmvwijà ne “cibwejàkàji.” Ne Baabùlòna ùdi ùmwènèka ku mbangilu wa Bible, mu Genèsè; ne ùdi ùmwènèka munkaci mwà Bible; ne ùdi ùmwènèka ku ndekeelu kwà Bible, mu Mukàndà wà ndekeelu, Bwàkabuulwibwà. Ne bu mùdìbì ne ùdi mu Bible mujimà, ùdi ne cyà kwikalakù kàbìdì leelù ewu.

<sup>5</sup> Ne, kàbìdì, byònsò bìdì pa buloba leelù ewu ebi, mu mùshindù wà bintu byà nyumà, bu mùdì Nyumà wa Nzambì

ne nyumà wa dyabùlù, ne tusùmbù twònsò twà ntendeleelu ne byònsò bitùdi naabi leelù ewu pa buloba ebi, mbibangile mu Genèsè. *Genèsè* ùdi ùmviwija ne “cibangidilu.” Ne bintu byònsò abi, nànsha nàнку mu dínà dikwàbò ne mu mmwènekelu mukwàbò, kàdi nyumà umwèumwè wákabanga mu Genèsè awu, ùdi ùmupàtula patòòke. Nènku ncyenzè ànu mùdi mucì wùdi wènda wùkola, wùbànda wùkafika too ne ku mutù, kwìkalàwu ne cyà kafika too ne mu katòngòbèlà ku ndekeelu, bwà manyooka manènè à Nzambi, kwàjikijilàYe maalu ònsò. Ne cyònsò cìvwà ne ntwàdijilu necìikalè ne ndekeelu. Ànu bintu bìvwà kabìyi ne ntwàdijilu abi kabyèna ne ndekeelu to.

<sup>6</sup> Ki bwà cinyì mwena—mwena Kilstò mulediibwe cyàkàbìdì kàtukù ne ndekeelu to, bwalu yèyè ùdi ne Mwoyi wà Cyendèlèlè. Ne Mwoyi wà Cyendèlèlè nciitùpà cyà Mwoyi Sungasunga wà Nzambi, bwalu Nzambi ngwa Cyendèlèlè. Nènku mwakù wùmwèwùmwè awu, mwakù wà cyena-Ngelìka *Zoe* wùdi wàmba ne “Mwoyi wà Nzambi” awu, pàdi Yesù wàkula wàmba ne: “Ndi mbàpèèsha Mwoyi wà Cyendèlèlè” apu, mwakù wùmwèwùmwè awu ngùdi mwangàciibwe cyàkàbìdì. Ki bwà cinyì, muntu udi mulediibwe cyàkàbìdì, nyumà wendè mmushintulula, ne ùdi ùlwa citùpà cyà Nzambi, mu mùshindù wà ne yèyè ùdi mwànà wa balùmè wa Nzambi. Ne yèyè ùdi wa Cyendèlèlè ànu mùdi Nzambi mwikàle wa Cyendèlèlè amu, bwalu yèyè ùdi citùpà cyà Nzambi, ku Dilediibwa dyèndè, Dilediibwa dyà mu nyumà.

<sup>7</sup> Mpindyewu, Baabùlòna wàkaashiibwa kùdi muntu dyèndè Nimèlòòde, uvwa mwànà wa Ham, muntu mubì wa kacya.

<sup>8</sup> Ne Baabùlòna ùvwa musangu kampànda ciimamwèndè wa bukalenge cyà buloba. Pààkiibakiibwà cimenga cinène eci kuntwaku, tuubimenga tukesè twònsò, mu nyùngulukilu mwònsò amu, tùvwa tùfuta milàmbù, bitàdi, ne bikwàbò, kùdi cimenga cinène eci, Baabùlòna.

<sup>9</sup> Ne mwòmò amu, bu nwènù mwà kubala mu yimwè yà ku mikànda yà kale, bu mùdi *Baabùlòna Yibidì* wà Hislop, ne àbùngì à ku maalu-malonda à kale, nenùsanganè ne bàvwa ne malongesha à àkòka ntèmà à mishindù yònsò muntwamu. Bàvwa muntwamu ne muntu mukàji, nyèna mwà kuvùluka dínà dyèndè mpindyewu to, nènku ùvwa mwà kupeta miji yà pabwàyi nènku. . . ùyìpàtula mu buloba, wènza naayi tunzambì kampànda. bàtu bìitabuujà ne ntwòtù tunzambì atu twàkangatà Yakòbò kùdi tatwèndè-mwenu, tumwè twà ku tunzambì twà miji atu ne bikwàbò. Ànu tusùmbù tukesè cyanààna, ne mu byòbì bintu abi kupàtukilamù tusùmbù twà ntèndeleelu tutùdi tumòna pa buloba leelù ewu etu. Bu nwènù mwà kumòna ngiikàdilù watù, ne ngiikàdilù wa bintu ebi leelù ewu, ngiikàdilù umwèumwè awu.

<sup>10</sup> Pa nàнку, Baabùlona ùvwa musòmbèle ànu mu cibandabanda cinènè cyà bufukè aci kuntwaku, ne ùvwa munyùngùlùkila kùdi Musùlù wà Efalàtà ne wà Tigre, ne ùpetelaku màyi. Nènku cívwa nsangilu munènè wa maalu à madimi. Ne Baabùlona ùvwa cimenga cinène. Nènku, cìdi cìpacila, bu kilòmèetà lukàmà ne makùmi citèemà mu nyùngùlukilu wa cimenga aci; kilòmèetà makùmi ànaayi ne mwandamukùlù luseke lwònsò, aci ncifwànyine kwenza kilòmèetà lukàmà ne makùmi citèemà ne yìbìdì mu nyùngùlukilu. Bàdi bàmba ne misèèsù yà mu cimenga cyà Baabùlona yìvwa ne bucyàmà bwà mètres makùmi àsambòmbò ne ùmwè. Bimanu bìvwa ne mupimbu wà mètres makùmi àbìdì ne ànaayi, ne byàmba kufika ku butùmbùkè bwà mètres makùmi citèemà ne àbìdì. Bàvwa mwà kwenzelapù mbilu yà ditembangana yà màkalù à mvità bànyùnguluka pa bimanu ebi, ne màkalù à mvità. Ne bìibi bìvwa byenza byà cyamù cyà mitakù, ne byòbì bìibi abi bìvwa mwà kwikala byà mètres makùmi citèemà ne àbìdì mu bucyàmà. Ne ànu munkaci menemene mwà cimenga amu ki mùvwà nzùbù wa bukalenge, ne nzùbù wa bukalenge awu ùvwà nnkwasa wa butùmbì. Ne munkaci mwà cimenga amu mùvwà mùpàtuka musùlù munène, wà Efalàtà. Bu nwènù mwà kucimòna, ncimenga cyà dyabùlù, bwalu ncitentwila pa Cimenga cyà Nzambì, bu Musùlù wà Mwoyi kumpalà kwà Nkwasa wa butùmbi. Ne mu cimenga eci, bàvwa ne mpangu minènè, yà kuulu, ku bimanu aku, mu nyùngulukilu amu.

<sup>11</sup> Nènku òvwa ditùngà dinène, dyà bukolè mu ciinè cikondo aci, mu mùshindù wà ne cívwa cicimùne buloba bìvwa bumanyike, ne buloba bujimà bìvwa bùlàmbula citàdì. Cívwa citantè bikolè mu maalu à mamanya, ne cívwa ne bintu bitàmbe kwikala byà ndekeelu bìvwa maalu à mamanya mafwànyine kupàtula. Cívwa ne màkalù à mvità matàmbe kwikala à ndekeelu, matàmbe kwikala à ndekeelu àvwàbo benzè, byà mvità bitàmbe kwikala byà bukolè, ne byamù byà bitàmbe bwìmpè. Cívwa cyà pabwàci kù bikwàbò byà pa buloba.

<sup>12</sup> Ne pashìshe munda mwà bimanu ebi, mùvwà Mfùmù Belètèshàsà mwikàle mfùmù mu cikondo cyà mwanda wà mikùkùku utùdì twakulapu dilòlò edi ewu. Mfùmù Belètèshàsà, ùdi Bible wàmba ne: “Nebùkandànèèsà, ùvwa tatwèndè awu,” kàdi mu bulelèlè yèyè ùvwa nkakwèndè uvwayè mupingàne mu nkwasa, Mfùmù Nebùkandànèèsà awu.

<sup>13</sup> Ne bààbùngì bàà kunùdì mbavùlùke ne Nebùkandànèèsà awu nguvwa ntwàdijilu wa makalenge à bàà Bisambà byà bendè, mutù wà ngòlò awu. Ne yèyè wàkabànda è kubwela mu Yelusàlèrà, uvwa mu ntàntà wa kilòmèetà yàbùngì, yàbùngì menemene, ne mukakwàte beena Yudà ne mulwè naabò mu bukalenge bwèndè, ne mubàvwijè bapika, kukwàtabò mudimu ne beena maalu à mamanya bààbò ne bikwàbò.

14 Ànu mwàkenzà Russie pàakabwelàye mu Allemagne amu. Nènku ki bwà cinyì bàakapeta bómbe bwà mushindà, ne bikwàbò, bàakangata beena maalu à mamanya bàà beena Allemagne abu. Ki bwà cinyì mbatàmbe kuya kumpàla leelù ewu, bàakabàkwàta è kuyabò naabò kuntwaku. Bòbò nkaayaabo, kabàvwa naaci to, kàdi bàakaya è kwangata bintu abi ànu mwàkenzà Nebùkàndanèèsà beena Yudà amu.

15 Nènku tudi tusangana ne, mu ciinè cikondo eci, kùvwa muntu mwakàne dyèndè Danyèlè, mupròfeta wa Mukalenge, uvwa mukwàciibwe mu bupika mu cikondo aci. Ùkaavwa mukwàte mudimu bu mfùmù kumutù kwà balongi bònsò bàà mabùlunga a muulu abu, ne bikwàbò, ne bantu bàà lungènyi ne beena Meeji, mu bukòokeshi bwà Mfùmù Nebùkàndanèèsà.

16 Nènku mpindyewu Belètèshàsà nguvwa mwangàte bukòokeshi. Belètèshàsà ùvwa muntu wa ngiikàdìlù wa lwonji. Kàvwakù yèyè ànu ùbicyùka to.

17 Ki pashìishe bantu bònsò bàà mu Baabùlòna abu, mu dikùbiibwa dyà mùshindù wùvwàbo bàdyùmvwà naadi adi's! Dyà bàsanganyiibwa munda mwà biibi abi anyi, ne biibi abi bikànga, ne bimanu byà bule bwà mètres makùmi àsambòmbò ne umwe, ne mupimbu wà mètres makùmi àbìdì ne ànaayi, anjì elààyibi meeji tǔng mùvwàbo ne cyà kwikalakù badyùmvwè mu dikùbiibwa munda mwà byòbì bimanu abi!

18 Kàdi vùlukàayi ànu eci. Nànsha maalu à mamanya manùshìye mu dikùbiibwa dyà bishi, Nzambì neàkusokòlòlè pawènzà mpèkaatù! Kùdi dikùbiibwa ànu dimwèpelè, ndidì mu Kìlistò Yesù.

19 Mpindyewu, bu mùvwàbo bàdyùmvwà ne musinga munènè wà kwikala ditùngà divwà dilombolà buloba bujimà, cifwànyikijilu menemene cyà dishidimuka dyà ngiikàdìlù yà cyena leelù edi, dyà bwena ditùdìmu edi, Àmèrikè mulenga wa dikèma ewu. Ne mèmè ndi bu mutàcishìibwe, mèmè mwinè, kàdi ndi nciina's mutùkaadi twangata lwidì lùmwèlùmwe lwàkangatàbo alu. Mutùdì tudyùmvwà ne bwalu tudi bapetè, citùdì twela meeji ne, mbeena maalu à mamanya batàmbe bwìmpè, ne bingoma byà mwambùuyi byà bitàmbe bwìmpè, ne maabòmbè à mushindà, ne ndèkè yà lubilu lukolè lwà njàjàmà, ne biikàle ne... Bu mutùdì ditùngà dilombodi dyà buloba bujimà, mu mùshindù kampànda tudi badyùmvwè mu dikùbiibwa dyà katuyi ne Nzambì to.

20 S'ncitembelu cilenga cyà dikèma. Kàdi Nzambì kàtu ùshintulukakù to. Lwidì Lwèndè bwà mpèkaatù ndùmwèlùmwe alu leelù ewu ànu mwàkadìlu musangu awu amu. Kàdi kakwènakù cisokomenu pànwapa to. Ànu mu Kìlistò mmùdì mukùbiibwe.

<sup>21</sup> Nènku mu cimenga cinènè eci, ànu mwàkumvwàbo ne kakùvwakù mùshindù nànsha mukesè to, pa buloba, bwà cilwilu kampànda kukwàtaci ciinè cimenga aci. Bimanu binène, bitùmbùke, ne byamu byàbò byà cyena leelù abi, nènku bàvwa bakàngila beena pambèlu bwònsò njila. Kàdi kabàvwakù bamanyè ne ditùngà dyà cikisu divwà dibìikidiibwà ne mbeena Meedàayì ne beena Peelààsà, bàdi leelù ewu ba-Hindus bàà mu Inde aba, kabàvwakù bamanyè ne mu ntàntà wa kilòmèètà yàbùngì bàvwa munkaci mwà kuumbula njila wa musùlù, bwà kucìngùluja Musùlù wà Efalàtà, bwà bààmona mwà kwendela mwînshi mwà bimanu abi. Pàvwàbo bàdyùmvwa ne bàvwa bakùbìibwe apu's! Dìbà dyònsò bàvwa bàdyùmvwa mùshindù awu. Pìikalàbì cyà bushùwà ne bàakadyùmvwa nànkù awu, dìbà adi bàakaya bèndela mu mpèkaatù.

<sup>22</sup> Bidi bìmwèka mùshindù awu pàdì muntu ùfika mu mùshindù wà ùdyumvwa ne mmudikùmbànyine mu yéyè mwìnè, mpèkaatù ùdi ùbanga kumukwàta. Èkèleeziyà, ditùngà, muntu-nkààya, udi udyùmvwa ne kèna dijinga ne dikwàcisha kampànda dyà dyùmukila pambèlu to, mpèkaatù wàbangì kumukòokèsha. Aci ncilelèlè. Nènku tudi bafwànyine kumòna, kàbìdì ne, pàdì bantu bàbanga kuumvwa njiyà yà butùmbùke ayi, pa ciibidilu mpèkaatù ùdi ùdyadija mu yéyè ne ùmudyà bu kamunguji.

<sup>23</sup> Nènku pàakakàngàbo biibi abi, bààkeela meeji ne bàvwa bakùbìibwe. Kàdi Nzambì ùtu ùpwekesha mèsù pànshì kuumukila mu Maulu! “Ne mpèkaatù mbundù kùdi ditùngà kanà dyònsò edi.”

<sup>24</sup> Mémè ndi ndìkonka, dilòòlò edi, ne byamù byètù byònsò binènè byà mudimu, ne bikòntononyi byètù byà mu mbù byà maabòmbè ebi, ne tundèkè twètù tuyaayè lubilu lwà nkamà yàbùngì yà kilòmèètà ku kasùnsukilà kàà kasunsa, tùdi nànsha, anyì, mu kasunsa kàmwè, tùdi mene mwà kusambuka ne cimanu cipùmbishi cyà díyi. Kàdi, kwikadikù wàpwà mwoyi ne mpèkaatù yèbè yàdyàkukupeta to!

<sup>25</sup> Nènku, mu cikondo eci, bàkaavwa bakàngè biibi. Nènku bààkeela meeji ne bàvwa bafwànyine, mwà kwikala ànu basòmbèle mu didyà dyàbò ne dinwà mùvwàbo baswè kwenza amu, bwalu bàvwa bakùbìibwe. Bòbò mbàvwà ditùngà divwà dilombolà, matùngà makwàbò ònsò àvwa mabàtàngile bòbò bwà maalu à mamanya ne bwà—bwà dikwàcisha.

<sup>26</sup> Ne pa nànkù, mu cikondo cyà bwena aci, kùvwa . . . Mfùmù ewu wàkadyàmbidila ne ùvwa mufwànyine kudìpakù cikondo cyà dicyònkómoka. Ki kulongololayè ditùkù divwàye ne cyà kwenza cibìlù cinènè cyà maja, anyì, mùndì mémè mufwànyine kwamba, maja à bidùndadùnda à cyena-leelù; kakùyì kàbìdì cyà kusàkidilakù to. Ki pa nànkù kwimanyikayì cikondo, ne kubìikilayè bantu bàà lumù, màsàlaayì ònsò ne tùpiteenà, ne bakàjì bònsò ne bakàjì bàà nsàkidilù.

27 Mpindyewu, mukàji wa nsàkidilù ùtu ànu ndumbà wètù ewu mwitaba kùdi mikenji. Nènku nudi numòna ne, pàdi muntu ùdyùmvwa mudikùmbànyine, ki pàdiye ùtwàdija kwendela mu mpèkaatù anyi?

28 Ki yêyè kulòmbesha maalà makolè à matàmbe bwîmpè àvwàye mufwànyine kupeta awu, bwà fetè munène wa maja à bidùndadùnda uvwayè mwà kwenza ewu. Ùvwa wèla meeji ne ùvwa mukùbiibwe. Ùvwa wèla meeji ne kakùvwakù cintu nànsha cìmwè cìvwa cifwànyine kumwenzela bibi to, bwalu ùvwa mu dikùbiibwa. Nènku yêyè ùvwa ne fetè munène ewu mu lùmwè lwà ku mpangu yèndè kumfundu kwà nzùbù wa bukalenga. Ne pàvwàbo pambèlu apu mu lupangu amu, pàmwàpa bàvwa balengèjemù mulwè mulenga mwà menemene, tuumyèndù twònsò twà tuumùnyiiimùnyi tulembèleja, ne kwangata bansongàakàji bajì bàà maja ne bakàji bààbùngì bwà kulwa kucyònkomoja bàsàlaayi. Ne maalà àbò à bière ne mvinyò yàbò! Aci kaciyi ndongolwelu mwîmpè wa cyena-leelù wa fetè wa bidùndadùnda leelù ewu to, ncyèna mumanyè wa nànkù kùdiye mufwànyine kwikala to. Ki mùdibi menemene. Ki kulongolabò bintu byònsò, nènku bàvwa ne cyà kupicila mu cikondo cyà dicyònkomoja.

29 Ne kakùyi mpatà to ne bakàji basèla bàakàlwa. Baabàyaabò bàvwa bashààle kumbèlu bu bandeji bàà bánà, pàvwàbo bóbò bapàtùke bayè kaciyònkomoja apu. Ne byà mwomùmwe kàbidi, kakùyi mpatà to maamù kampànda ùvwa wènda ùtambàkana, ne mwànà wa mu dibòkò ùsaama, pàvwa mulùmè mukwàcike maluvu mupàtùke muyè kaciyònkomoja. Aci's cidi ànu maanyi mu nkùnde, nkùnde mu maanyi's.

30 Nènku ndi mwà kubàmòna mùdibo bàbanga kunwà maalà ne kaciyònkomoja. Ndi mufwànyine kudifwànyikijila ne bàakabiikidisha cisùmbù cyà bimbi bàà misambu, ne kwimbabò mijiki. Ne tunsongà tunyùngululàngana muntu ne mukwèndè. Ne bàsàlaayi, bàkwàcike maalà, bàkwàta bakàji bàbàkupa muulu ku mutù kwa mitù yààbu, ne bàbàtwa mishikù ne basòmba mu nkwasà, ne bèèla bibingu byà disànka. Bèèla meeji ne bàvwa bakùbiibwe!

31 Kaa, Àmèrikè wa yààya, Nzambi wàkatàngija mèsù pànshi pa fetè wa bantu bakwàcike maalà, wa bidùndadùnda awu awu, mmunùtàngile dilòòlò edi!

32 Nènku ncikondo kaayi cìvwàbo munkaci mwà kupicila's wè! Kàbidi ndi mwà kudifwànyikijila mfùmù ewu kaaba aka, Beelètèshàsà, ùvwa ng'Elvis Presley wa cyena-leelù ewu, ùvwa mwà kwenza bifidi byà disànka bùngì cyanàànà bìvwàbo naabi abi. Ne lukutukutu lwàbò lwònsò alu, kàdi kabàyi bamanyè, díbà dyònsò adi ne, lufù lùvwa lulàle ku ciibi to!

33 Pa nànkù, pàakafikà fetè awu pa bulenga bwèndè, pa ciibidilu ànu mùtùbi bu mmwènekèlu munène wa tudyòmbà twà

ntèlèviziyò twà cyena-leelù twà Hollywood, bàvwa bèèla meeji ne bàvwa bafwànyinekù kulàsula minèkù kampànda milenga pa ntèdeleelu; byenzè bu ndongamu wa ku tudyòmbà wa Arthur Godfrey, anyi cintu cyà bwena-leelù leelù ewu, anyi cintu kampànda cyà mupòodi wa tumuma twà pois Ernie Ford, kulàsulakù munèkù kampànda pa muyiishi awu. Kàdi Nzambi mu Dyulu ùcidi ànu ùtàngija mèsù panshi! Kàdi bàvwa bàdyàmbidila ne bàvwa basòmbèle mu ditùngà òvwàbo kabàyi mwà kulenga to. Kàdi wèwè's udi unowa cyùdi ukùna aci!

<sup>34</sup> Ikàlaayi ànu bamanyè aci, nwènù aba. Nànsha nwènù biikàle ditùnga, anyi èkèleeziyà, anyi muntu-nkààyà, udi unowa cyùdi ukùna aci!

<sup>35</sup> Kàdi, mòna's, ndi mwà kumòna mfùmù ewu ùjuuka kuulu, wàmba ne: "Anji indilaayi tùng, nsongàakàjì, twànji twèlàayikù munèkù mwîmpè wà butèndèleedi pa muyiishi awu," anyi ne bikwàbò.

<sup>36</sup> Ne tuumyèndù twònsò twà tuumùnyimùnyi tütètèmba, ne nsongàakàjì ayi yàmba ne: "Éyi's wè! Éyowà, ndi ngeela meeji ne tudi bafwànyine kwanyisha bwà kutèeleja aci."

<sup>37</sup> Ne bàsàlaayi bàà nsongàalùmè abu bàtùngunuka ne lukutukutu bu bàna bàà bitende bàà leelù ewu aba, bwalu eci kí ncíngà cintu to cidì ànu Baabùlòna wa cyena-leelù! Mémè ndi mwena Àmèrikè, kàdi's ki mwàkadi pèndè Danyèlè mu Baabùlòna mu cikondo aci. Kàdi aci kacyèna cìpèèsha mpèkaatù kabingilà nànsha!

Ngàkambila nsongàakàjì kampànda cikondo kampànda ne: "Udi mwena Kilistò anyi?"

Yèyè ne: "Ndi muswè kuumvwija ne, mémè ndi mwena Àmèrikè."

Mémè ne: "Aci kacyèna ne cidici cyàmba to." Nànsha kakesè!

<sup>38</sup> Ndi ne disànkà dyà kwikala mwena Àmèrikè, kàdi aci kacyèna ne cidici cyenza bwà kuleeja bwena Kilistò to; kí ncintu to. Twètù twenza mpèkaatù, netùyoobè bwà mpèkaatù yètù ayi, ikàlaayi ànu batwishiibwe bwà cyòci aci.

<sup>39</sup> Bàvwa ne mupròfetà muntwamu, kàdi kabàyi baswe kutèeleja to. Bàvwa ne Mukenji, kàdi bàvwa baswè kuWèlulwila.

<sup>40</sup> Aci kaciyi Àmèrikè wa cyena-leelù to, ncyèna mumumanyè to. Bàdi ne Èvànjeeliyò, Bulelèlè, kàdi mbaswè kuBwèlulwila.

<sup>41</sup> Ki kwambabò ne: "Tuyaayi tùkangàte mpànzà yà bansantu babùngùluki bàà mu malaba abu ayi, kàdi tùlwe naayi kaaba aka twènzèku naayi munèkù mwîmpè."

<sup>42</sup> Nzambi kàtu wítabila bangènzàmpèkaatù bwà kwelulwilabò bantu Bèndè to! Nwadyàkuyooaba bwà cyòci aci, díngà ditùkù.

43 Ki kùyabò kangata mpànzà yà Mukalenge, ne kubwelabò naayi mu ntempèlù, ne kuyabò bwà kanwina maluvu mimpè mu mpànzà yà Mukalenge ayi. Nènku pààkapòngolwelàbo maluvu àbò à Oertel's 92 anyi à Pabst Blue Ribbon awu, mu yôyi ayi, bwà kwenzelapù munèkù mwîmpè, kaa, kutuutakajabo bilâwudi ne mpànzà, ne kutwàdijabò kunwà, ne kuseka ne kwelulwila ntèndeleeleu wa Mukalenge. Bàvwa bapangè bìvwàbo munkaci mwà kwenza abi.

44 Nènku ki mudìbi kàbìdì bwà ditùnga edi, dilòòlò edi, bapangè kumanya ne bàdi munkaci mwà kubènga Mukenji wa Mukalenge Yesù Kilistò, mu dibàtiiza dyà Nyumà Mwîmpè, ne kwikala mulediibwe cyàkàbìdì.

45 Nànsha mùvwàbo batèndeleeedi amu, mpindyewu, fetè wa dikwàcika dyà maalà wa maja à bìdùndadùnda awu, s'vàvwa batèndeleeedi, bwalu Bible mmwambè ne: "Bààkatumbisha tunzambì twàbò atu."

46 Pa nàнку wèwè udi mwà kwikala mutèndeleeedi wa mu ùmwè, kàdi mwikàle ànu mupiiè! Ncyà bushùwà. Bwalu kí mbwà meeji matòòke to. "Kùdì njila udi umwèka bu mwîmpè kùdì muntu, kàdi ndekeelu wendè nnjila wa lufù." Pa nàнку bàvwa ne èkèleeziyà munène wa mbùlâmàtadi, ne ntèndeleeleu uvwabò mwà kusadila, ne bààkeelulwila bintu byà cijila byà Nzambì.

47 Nènku aci's cìdi ne ngiikàdìlù ànu menemene yà leelù ewu, bèelulwila bintu byà cijila byà Nzambì. Bàdi babiikila bantu, bàdi bàteeta kwikala ne nsòmbelu mukezùke ne wa kaneemu, ne wa maalu malulàme abu, bàdi bàbàbiikila ne "mbàà cyena-kale" anyi "munsantu mubùnguluki wa mu malaba," anyi dìnà dyà mùshindù kampànda dyà cilèndwishi. Ne bàdi bàbiikila mapà a Mukalenge, àdìYe wènza awu ne: "Cyenedi cyà nyumà wa bukooyà, bu mùdì mwena lubùku anyi démon." Kaa, mmunyi mùdiku mwà kupànduka ku cilumbulwidi? Mashi a bààkafwilà diitabuujà's àdi èèla lubila àcilwisha! Nzambì Yèye kàyi munyooka ditùngà edi bwà mpèkaatù wadì wa cyena-leelù ewu to, ne bikengelè bwà Àjuulè Sodomà ne Gomolà, bwa kubàlòmba luse bwà dibàbùtula. Ncyà bushùwà. Tudi mu njila batàngile ku cilumbulwidi! Ne maalu manènè à kukèma anùdì numòna Musùngidi wetù mubènèshiiibwe wènza aa, mbimanyinu bidimwiji ne, cilumbulwidi cikaadi pabwipi; ne mbitàmbàkàne mu ditùnga edi ku luseke ne ku luseke, kuumukila ku Esètè too ne ku Wesètè, kuumukila ku Nord too ne ku Sud. Kàdi bàdi bàCibènga ku maditambishi, bàCiseka, bàCidyula, bàCifùnda mu bibèjibeji byàbò abi ne "mmacimbu." Anji elàayi meeji pa bwalu abu, Baabùlòna wa cyena-leelù!

48 Mpindyewu pàvwàbò munkaci mwà kunwà maalà, bàtuutakaja bilâwudi byàbò mu kunwà apu; dyàkàmwè, pàvwà mubanjì munènè mwena bisànkasanka ewu, dìnà dyèndè



Belètèshàsà, ùkaavwa ànu ne ànwinè maalà mu cilàwudi cyèndè, mèsù èndè kumwèkawù bu àkaavwà àpàtuka mu nyama, pàakakùdimukàye ne kutàngila ku nzùbu wa bukalenge, bwalu wàkamòna, cìfùmina mu Dyulu, cyanza cyà Muntu, ki kubangaCì kufùnda cibànda cipweka ku cimanu.

49 Ndi muswè bwà nùmònè ne, Cyàkafùnda ku bùlaasàtálà bwà ku cimanu abu. Mpindyewu, pàmwápa bitèèkedi byà myèndù bìvwa bisanganyibwa pambèlu kuumukila pàvwà tuumyèndù twà tuumùnnyimùnyi apu, kùvwàbò bàjìila maja àbò à cyena-leelù à bìdùndadùnda awu aku, ki makénkè àvwa àteema àjìma ku cimanu aku. Nzambì kàtu wènzela maalu mu musokoko to!

Cìtu ànu mu makénkè, ki mùtù Nzambì wàkwila ne ùkwàcila mudimu. Pa nàнку cyanza Cyèndè citàmbe-mfùkìlu aci cìvwa pa bùlaasàtálà bwà ku cimanu apu, ku mèsù kwàbò bònsò.

50 Nènku mfùmù ngùvwa ne cyà kwikala mucimòne dyàmbedi, mwena minèkù wa cyena-leelù, mwena bikàsa mulenga wa ku tudyòmbà, mwenji wa manàyi wa ku ntèlèviziyó ewu. Pàvwàye ùtuutakaja cilàwudi apu, bwà kunwà, anyi lupànzà, cìvwàye naaci mu byanza aci, mèsù kumulòpokawù mu nyama, ki kudyùmvwàye yèyè yònsò munyùkùshìibwe. Ndi mufwànyìne kwela meeji ne ki mwàkadyùmvwàye. Bible mmwambè ne: “Mifùbà yèndè yàkatùukakana, myumùke ku manungu.” Ncyà bushùwà ne ùvwa yèyè yònsò munyùkùshìibwe, ànu byà menemene. Pàdi Nzambì ùbanga kuleeja bimanyinu Byèndè, díbà dyàkànyì dyà nwènù kunyùkùshìibwa. Ncyà bushùwà. Nènku pàakamònyàye, musambu wèndè wà bìdùndadùnda awu wàkamunyùkùsha.

51 Nènku díbà adi pàakamònyàye mufùndù ewu ku cimanu, ndi mwà kudifwànyìkijila kakàjàànà kakesè ne tushikù tulaaba kàpèntà kakùyì mùshindù to, ne nsukì yàkù yònsò myengeleja ne misalakaja, ne bàsàlaayi bakwàcìke maalà aba munkaci mwa dikàkùpilangana, kwambakù ne: “Ndi ndìkonka ne mbwalu kaayi bùdi bufikile nsongàalùmè ewu dilòòlò edi?” pàvwàku kashìkunkila apu.

52 Ki nsongàalùmè kampànda kukàkwàtayè, wàmba ne: “Èyo, lwàkù tùje pàmwè musambu wùdi wùlondà ewu.” Kàdi mujìki kwìmanawù.

53 Kaa, ditùngà dinènè dyà mpèkaatù edi, musangu kumpàla eku maja ènù à bìdùndadùnda awu neìmanè! Wèwè kùyì muswè kutèèleja díyi dyà muyiishi to, neùteeleje cyanza cyà Nzambì ku cilumbulwidi díngà ditùkù. Kàdi maja à bìdùndadùnda neìmanè, ànu mwàkiìmanà bisùmbù byà misambu abi amu, ne kwimbabò *Peepi Nèbè*, *Nzambì Wanyì* mu Titanic. Díngà ditùkù neùshintululè cyonà cyà musambu aci.

54 Ki mùjìki kwìmanawù. Ki kumònabò mwedi wàbò wà minèkù, muntu wabò—wabò mwèndè luumù wa ku ntèlèviziyó

awu, nènku, ùkaavwa mwimànyine kuulu, binù byèndè bituutàkanangana, pàvwàye ùtàngila ne ùmòna cintu cinène eci munkaci mwà kwenzeka apu. “Mòna’s,” mwàkambàye, “bimanu byònsò mbikànga eku ne eku. Ndi ne balami bàànyì biimàne ku ciibi cyà lupangu, muntu wanyì wa pa mwoyi wànyì.”

<sup>55</sup> Kàdi, nudi numòna’s, kabyèna bìkèngela bwà Nzambì àbwelelè ku ciibi nànsha, mùshindù wunùdì nwènù nudyèlela meeji awu. Yèyè ùdi ùtùuluka ùfùmina mu Butumbi! Ne cyanza Cyèndè ncìvwà munkaci mwà kufùndà ku cimanu aci.

<sup>56</sup> Nènku ne lùkàsà lwònsò, mwikàle mu mwaba wà cyena-leelù wà menemene, Bible mmwambè ne wàkabiikidisha beena mikendi bèndè bònsò, balongi bàà mabùlunga à muulu, bèepiskòòpò bònsò abu, balongeshi banène, ne baapaapà, ne baakàardinalè, ne bakwàbò. Ki yèyè ne: “Mpindyewu nènkwàmbilè, nwènù balùmyànà, ndi munùpèeshe dyésé dyà kuyiisha ne kwenza cinùdì baswè kwenza aci. Mpindyewu, ngumvwijaayi, Cidì ku cimanu cyàcyà.”

<sup>57</sup> Kàdi ànu mwàkadibi musangu awu amu, ki mùdibi kàbidi mpindyewu, kabàvwa biibidilàngàne ne citàmbe-mfùkilu to. Kabàvwa bamanyè kantu nànsha kàmwè pa Cyòci aci to. Kabàvwa bamanyè mwà kuumvwija myakulu myenyi to. Kabàvwa ne cìvwàbò bamanyè pa mwakulu wà mu Dyulu to. Nènku kushàlabò matàmà bu byàtà. Kabàvwa ne cìvwàbò bamanyè pa Cyòci aci to. Nènku pàvwàbò bònsò biimàne mwaba awu apu . . .

<sup>58</sup> Vùlukàayi ne, eci ki dibweja dyà bukalenge bwà bàà Bisàmbà byà bendè. Ne ànu mwàkabwelelèbu ku citàmbe-mfùkilu amu, nebùjikilè ku citàmbe-mfùkilu.

<sup>59</sup> Kàdi bèepiskòòpò ne baakàardinalè, ne balongeshi banène aba, kabàvwa mwà kuumvwija citàmbe-mfùkilu to. Kabàvwakù bamanyè kantu nànsha kàmwè pa Cyòci aci to. Bààkatàngila mu mikàndà yàbò yònsò yà dipiluka, kàdi kabàyikù mwà kupeta cintu nànsha cimwè cìvwà cìfwànyine kufwànyikijiibwa ne Cyòci aci to. Nudi numòna’s, bintu byà nyumà bàdi babyùmvwila mu nyumà. Nènku dîbà adi bàakatàcishiibwa bònsò, ne bàakapanga cyà dyanza.

<sup>60</sup> Nènku, ndekeelu wa byònsò, kaamukalenge mukàjì kakesè kampànda. Vùlukàayi ne, yèyè kàvwa mu fetè wa maja à bìdùndadùndà awu nànshà. Ne mùshindù wùmwèpelè wàkamanyàye ne cintu kampànda cìvwa munkaci mwà kwenzeka, bàakamutùmina mukenji ne mfùmù ùvwa munyùkùshìibwe yònsò, ne fetè ùvwa mwimàne. Yèyè ùvwa mufwànyine kwikala umwe wa ku beena kwitabuuja bàà bìmpè abu. Kàdi, mu mùshindù kampànda anyì kansanga, yèyè nguvwa kàyi mupwèku mwoyi to.

<sup>61</sup> Kubwelayè lubilu mu fetè amu. Ne pàakamònyè mwenji wa minèkù wa cyena-leelù awu munyùkùshìibwe yònsò, ne

musumbà wèndè wà bimbi bàà misambu wónsò, yèyè ne: “Éyi mfùmù wa yààya, kolà booboobo!” Kàdi kàvwa mumanyè ne ùvwa mufwè pa cibànza to. Yèyè ne: “Kolà booboobo! Ndi mumanyè ne nudi batàcishùbwe bônso bwà mufundu wùdi ku cimanu wàwa. Ne ndi mmòna paapà, ne bèèpiskòòpò ne baakàrdinalè, ne balongeshi mu bunzambì, ne nànsha umwe wa kùdibo kàyì mwà kuWùbala to. Kàdi, Éyi, mfùmù wà yààya, lekèlè nkwambilèku bwalu kampànda! Kùdi muntu mu bukalenge bwèbè emu, udi mumanyè byà citàmbe-mfùkilu.”

<sup>62</sup> Kaa, mwanèètù, patùdi tumòna mufundù ku cimanu, leelù ewu, kàdi’s kùdi Muntu udi mumanyè bwalu abu. Udi mufwànyine kwikala mupicìle mu bìrò ne bìrò byà ngàngàbukà yònsò mu cimenga emu, ne bakwambile ne: “Udi ne cyà kufwà.” Kàdi’s kùdi Muntu! Wèwè udi mufwànyine kwikala mwendèle mu mpèkaatù mu mùshindù wà ne musùukà wèbè mwikàle mufiike fitùtù mùdi bimanu bikooyike byà ifernò amu, ne mwikàle pawìpi ne kudishipa, kakùyì ditèkemena to. Kàdi kùdi Muntu, ne Dìna Dyèndè n’Yesù! Yèyè mmumanyè citàmbe-mfùkilu. Ne Ùdi mu Bukalenge bwètù, bwalu twètù tudi bàna bàà mu Bukalenge Bwèndè. Kùdi Muntu!

<sup>63</sup> Yèyè ne: “Yèyè awu mmumanyè citàmbe-mfùkilu, bwalu kùkaadi bidimu bààkasangana Nyumà wa Nzambì munda mwèndè. Ne ùvwa ne Nyumà mulenga be. Ùvwa mwà kuumvwija bilòòtà, ùmòna bikèèna-kumòna, ne cyònsò cyà kùdibi civwa ànu cyà bushùwà menemene. Pa nàнку, kùpampakanyikù to, anjì mpèèshèku ànu tusunsa tukese cyanààna ne mèmè nèndwè nèndè mwab’ewu.”

<sup>64</sup> Nekwikalè dīngà ditùkù dinwàMusòkà! Udi mufwànyine kupanga kwikala ne mwaba wà kuMutèèka mu nzùbù mwèbè. Udi mutàmbe kwikala ne mudimu wàbùngì, mu kubandila kwà ntèlèviziyò, kunàyà kwà twartà, kunwà kwà maala à byèrè, kukabwèla mu maafetè à bìdùndadùndà. Kàdi kùdi musangu wùmwèpelè wuwàMusòkà! Ncyà bushùwà.

<sup>65</sup> Ki kulwabò ne Danyèlè muntwamu. Ne pàakalwàbo nèndè muntwamu...Muyiishi wa bwakàne, mulùme wa Nzambì! Ncyènakù mufwànyine kudifwànyikijila mulùme wa Nzambì wa musòmbèle mu mwaba wà mùshindù awu kàyì mucitàndishe to. Kàdi, nudi numòna’s, mfùmù awu kàvwa muBùcyùkekù to, ki bwà cinyi wàkasanganyibwa mu ngiikadilù uvwayè ùsanganyibwa awu.

<sup>66</sup> Ki kulwabò ne Danyèlè, kwambayè ne: “Bwà cinyi baapaapà ne ba-docteurs bèèbè kabèèna mwà kukumvwijaci?” Kabàvwa ne cyà kuumvwijabò naaci to.

<sup>67</sup> Nàнку dībà adi cyàkenzekà ncinyi? Danyèlè kwambayè ne: “Kaa, Belètèshàsà, wèwè ewu’s uvwa mumanyè bintu byònsò ebi. Kì mbikusokoka to.”

<sup>68</sup> Nènkù ndi ngambila Àmèrikè! Mvw'a kujingakù bwà kubàfikisha, mu kasunsa emu, ku dyùmvwà díyì dyànyì dyà mukana. Kanwèna bapangè bintu byònsò ebi to! Ànu mùvwà matungà à kale menzè mpèkaatù ne menzè bitùdi benzè ebi, tudì bapimùibwè mu cipiminu, ne basangànyìibwe katùyi ne bujitu to. Cidì cyenzèkèlè France ncinyi? Cidì cyenzèkèlè Allemagne ncinyi? Cidì cyenzèkèlè matungà makwàbò àvwa maditwe mu “mvinyò, bakàji, ne dicyònkómoka” ncinyi? Bitu misangu yònsò ànu bikajika mùshindù awu, ne twètù katwèna batwìbwe cisàlù cyà kubènga kupìcila ku cilumbulwidi to. Nzambi mmwakàne.

<sup>69</sup> Ki yèyè ne: “Tatwèbè, mùshindù mwinè wàkamuvwija Nzambi ditungà dinène, kàdi yèyè kucìpwa mwoyi. Ne yèyè wàkenza bintu ànu byòbì bimwèbìmwè byùdi wèwè munkaci mwà kwenza ebi, ki Nzambi kumuvwija nyama wa cinku.” Yèyè ne: “Wèwè udi mumanyè maalu aa, kàdi pashiishe wangata mpànza Yèndè yà cijila uyìseka.” Mònaayi. Kwambayè ne: “Mufùndù mmumana kufùnda ku cimanu, ne pa díbà edi bukalenge bwèbè mbumanè kubadiibwa.” Mu ngaakwilù mukwàbò ne: “Tàngilà kùneeku, mulùmyànà, matùkù èbè mmabadiibwè! Bukalenge bwèbè bààkunyèngibù ne bábùpèèshi ditungà dikwàbò, dyà mbazù, ditungà dìdì kadiyi dimanyè Nzambi to,” òmwè dyà—dyà dìbì mùdìbò bóbò amu. Nzambi ùdi wènzà ne mpèkaatù àlwishanganè ne mpèkaatù. Ndikonka, leelù ewu!

<sup>70</sup> Ànu pa díbà òmwèdìmwè adi, swàyi ngànji ngàmbèku ne, pàvwàye mwimàne mwaba awu, ùbandila Mufùndù awu ku cimanu apu, kàvwa mumanyè ne ànu mwìnshì mwà biibi abi mene, díbà adi mene, balami bàkaavwa bamana kushipa to. Ne màsàlaayi àvwa mu misèèsù, munkaci mwà kushipa balami bàà mu nzùbu wa bukalenge. Bàvwa ku bibàndilu. Ne bakàji abu biimàne mwaba awu, kule ne bānà bààbò bàà mu mabòko, kule ne baabàyaabò, ne baabàyaabò kule ne bakàji bààbò, bònsò bakwàcike, bàlonda maja à mùshindù kampànda à cyena-leelù ne lukutukutu. Kàdi màsàlaayi àkaavwa pa bibàndilu, mu tusunsa tukesè mfùmù awu ùvwa mwà kushipiibwa. Musùmbà wònsò wà bantu bakwàcike maalà awu bàvwa mwà kushipiibwa, kùdì ditungà dyà kadiyi diitaba ne Nzambi ùdikù, dikwàta kùdì démon. Ne bakàji bàvwa mwà kuvùùdiibwa bilàmbà, bansongàakàji ne bakwàbò, bàlààla naabò ku bukolè mu mùsèèsù; pashiishe bàbàbàkwila ku bikànkanyì, ne bàbàtaayishila mitù ayi ku bimanu. Bàbàpandulula paanyimà pàà bamanè kulààla nààbò mu lukùkà; màsàlaayi mabùlùke, makwàcike maalà! Cìvwa ku ciibi, bwalu bàvwa beediibwe ku cipimu, basangànyìibwè kabàyi ne bujitu.

<sup>71</sup> Kàdi ndi ndikonka, leelù ewu, mu ditungunuka dyètù dyònsò dyà cyena-leelù edi, diseka dyònsò ne dyelulwila dyà masangisha à dyondopa ebi, diseka ne dyelulwila dyà Èkèleeziyà wa Nzambi

udi ne mwoyi, ne batungùnùke ànu mùdi Bible mwambe ne bàvwa mwà kwenza amu ne: “Bàà mutù mukolè, badibàndishi, biikàle ne cimwènekèlu cyà difwànà dyà Nzambì, kàdi bàvila Bukolè bwàdi.”

<sup>72</sup> Ndi ndìkonka, mu ditùkù edi ditùdi twela meeji ne tudi bakùbiibwe menemene, kàdi, dyàkàmwè, tujandula ne Russie mmutùdyànjidile ne bidimu bitaanu, mu maalu à mamanya.

<sup>73</sup> Tudi bayààyàaye ku maafetè mapite búngi. Tudi tutàmba kwendela mu mpèkaatù be. Èkèleeziyà mmulààle tulù be, kàcyèna ùcyùka kàbìdi bwà masangisha à milòmbò to. Kabèèna babùcyùka to. Bòbò, kàbìdi, bààkeela kakàndà bwà kulwishangana ne Nyumà wa cyà bushùwà, mulelèlè wa Nzambì udi ne mwoyi; kî mbaàswe to.

Mbàtàmbe kwikala dingumba, bavwàle ne ku mènù! Kabèènakù ne díbà bwà masangisha à milòmbò to, bàdi ku ntèlèviziyò, ne mu sèndèmà, ne bènda bàjèmbelela eku ne eku, ne ku maafetè à bantu bakwàcike maalà ne bikwàbò. Aci's ncyà bushùwà!

<sup>74</sup> Aci cìdi mwà kumwèkà cyà cyena-kale, kàdi ki cìdi cikèngelà bwà ditùnga leelù ewu. Kùdi buubilùmaabikàjì búngi cyanààna myaba yònsò ne Èvànjeeliyò, ne gants yà ndundu mivwàla ku byanza. Bìdi bikèngela Àkwàciibwè ne byanza kabìyi byela ndundu to, ku Nyumà Mwímpè. Bushùwà menemene!

<sup>75</sup> Billy Graham mmwambè, kùkaadi bu lumingu lujimà anyi mbingu yìbìdi, mu òmwè dyà ku mayiisha èndè, yèyè ne: “Ditùnga edi didi mwà kulwa dyàpà dyà Russie, díbà kanà dyònsò didi Russie mwà kujinga adi.” Tukàadi penyì?

<sup>76</sup> Neùsumbè mikàbà yà mèyì yà Elvis Presley, ne neùshaalè kumbèlu upùmbisha mu èkèleeziyà bwà kutèeleja *Tudi Banangè Sacy*, òmwè dyà ku matùkù àdi panshi aa! Udi mwediibwè ku cipimu, kàdi bakusangàne kùyì bujitu! Cìdi cyenzèke ncinyì? Kùdi mufundu ku cimanu!

<sup>77</sup> Beena Russie mbatèèke sàtèlitè muulu utùdi katùyikù mwà kukòntonona kantu kèndè nànsha kàmwè to, mu ntàntà wa kilòmèètà nkàmà mwandamukùlù ne buloba; ne mbafwànyine kuyitèeka yisambòmbò mijimà kuulu kwà Ètats-Unis mu tusunsa makùmi àsàtù tùdi tùlondà etu, ne kumanyisha bantu ku téléfònè ne: “Difilaayi, cyanààna nudi nushààla mushikì wà butù mu tusunsa tukesè emu.” Bòbò's bàdi mwà kucyènza. Kakwèna cintu nànsha cimwè citùdi mwà kwenza bwà kubàpangisha to. Cìdi mu byanza byàbò, ba-communistes bàdi kabàyi ne mashi, kabàyi ne luse, kabàyi bàneemeka Nzambì aba's! Kì cìdi Nzambì ùkwàta naaci mudimu bwà kwenza ne mpèkaatù àpatukilè patòòke. Ncyà bushùwà. Bu nwènù mwà kubala Bible, bìdi bikèngela bwà Russie kwenzayè cyòci aci bilondèshile Bwàkabalwibwà. Eyo, nwènù balongeshi

bàà cipròfetà nudi bafwànyine kupangakana ne Cyôci aci, kàdi indilaayi ànu cyanààna too ne pìikalàci cijikè. Russie mmutèèkiibwe mwab'ewu mbwà kiipàcìlà mene aku. Bible ngudi mwambè nànkù.

<sup>78</sup> Mpindyewu ki yéyè ewu ne sàtèlitè. Twètù kuteeta kutuma umwe dilòlò adi, tuvwa tudyàmbidila ne netwikalè mwà kwenza ànu mwàkenzàbo amu; kujuukayè panshì è kubànda mètre umwe, kàdi kutaayikayè pwakàlàkàà. Maja à bidùndadùndà ne mpèkaatù bùngì cyanààna's! Tudi beedibwe ku cipiminu, ne basangànyibwe katùyi bujitu. Nzambì, ikàlàkù ne luse!

<sup>79</sup> Citwikalà mwà kwenza ncinyi? Cidi cifwànyine kwenzeka ncinyi bu bôbô mwà kutùma maasàtèlitè awu muulu ne missiles ayi, bàmba ne: “Difilaayi, cyanààna nudi nulwa mushiki wà lupwishi mu tusunsa tùtaanu emu”? Mu bushùwà bwà bwalu, bukalenge bwètù, bwà kusùngila myoyi yà bantu, s'mbufwànyine kudifila. S'ki cintu cimwèpelè cidibo mwà kwenza.

<sup>80</sup> Pashiishe ncinyi cidi cifwànyine kwenzekela bàmwè bàà kunùdi nwènù beena Àmèrikè, twètù bônso muneemu emu; kì mmuneemu to, kàdi ndi njinga kwamba bwà ditùnga dijimà? Ngàakula bwà ditùnga dijimà!

<sup>81</sup> Nwènù tukàji tùdi tùdifyelà, twànà twà bakàji tùdi twènda tütàmbakana ne tushikù twènù tulaaba tùpèntà byenzè bu lutùngà lwà rósè; kàdi tufwànyine kuseka muyiishi mu disangu, munkaci mwà kuyiisha Èvànjeeliyò. Ne wèwè, nsongà, udi wela meeji ne udi ne bukitù kutàmba mùdi ne lungènyi lwà kubùntònona naalù awu!

<sup>82</sup> Cìikalà mwà kukwenzekela wèwè ncinyi, papa, udi usòmba kumbèlu dilòlò ne maman nubandila ntèlèviziyò, piinè apu mwan'èbè wa balùma ùsanganyibwa mu kàshinyi kàà lubilu lukolè, ne yààyèndè ku cinwinù cyà maalà mwaba kampànda, ne mwikalè kuntwaku ùja maja èndè à bidùndadùndà? Ne wèwè eku ubandila ntèlèviziyò, ne welulwila Èvànjeeliyò!

<sup>83</sup> Cìikalà mwà kukwenzekela ncinyi, wèwè cidimba cyà èkèleeziyà? Cìikalà mwà kukwenzekela ncinyi? Udi mwà kwikala ne dìnà dyèbè difùnda mu mukàndà ne mukàndà wònsò, wà mu èkèleeziyà mutàmbe bunène wa mu cimenga aci; kadi wèwè kùyi mu dikùbiibwa dyà Mashi à Mukalenge Yesù to, neubütukè pàmwè ne aba bààbütukà, kakwènakù ditèkemena bwèbè wèwè to.

<sup>84</sup> Cìikalà mwà kwenzeka ncinyi? Nkwakù kùdi sàtèlitè muulu mwàma. Kàdi cidi cifwànyine kwenzeka ncinyi? Ditùnga's ndifwànyine kudifila's, mu bushùwà bwà bwalu, ki cintu cimwèpelè cyà meeji cidi bukalenge bufwànyineku kwenza.

85 Dìbà adi cìdì cyènzekà ncinyi? Divwala paanyimà pàa divwala, dyà màzuwà à màyi mambùle màsàlaayi; divwala paanyimà pàa divwala, dyà ndèkè; mbifwànyine kwikila mu ditunga emu. Bakàji's mbafwànyine kulààla naabò ku bukolè mu misèèsù. Ncinyi cinùdi bafwànyine kwenza? Ndishààle dyàbò bóbò. Mwipàciùbwe mu nzùbù webè, bóbò's nebàdyàngàtè ku bukòòkèshe.

86 Ncinyi cyànwènzekelà nwènù bânà bàà bakàji batekète, ne nwènù bansongààlùmè, ne nwènù bònsò pa diinè dìbà adi? Kudi ne cyà kwikale dinyookiibwè bwà mpèkaatù! Nànsha ciikàle ditungà kaayi, anyi ciikàle nganyi, bidi ne cyà kwikala nàнку. Nì mmuntu-nkààya, anyi ditunga, ùdi ne cyà kunyòòkiibwa! Nènku musùmbà wà bàsàlaayi bàà ciputuku, bàdi kabàyi bàneemeka Nzambì, ne myedi ku cibàngà, màsàlaayi à baa communistes mmafwànyine kukwàta bakàji beenu ne kubànyangilabò bumùntù, bânà bèènù bàà bakàji abu. Ne wèwè udi mufwànyine kwimana mucitàngila ne èbè abidi, kakwèna cyùdi mwà kwenza pa bwalu abu to.

87 Ncinyi cìdì cìlela cyòcì aci? S'mbwalu udi mutèèlèje bintu byà macimbu bu mùdi ndongamu yà ku ntèlèviziyò yà maja à bìdùndadùndà ne mpèkaatù eyi, ne muyiishi kampànda mukwàte mashika ne wa bintu byà kwisùkwisù kàyi mukùmbàne mwà kuumvwija citàmbe-mfùkilu to. Mufundù wùdi ku cimanu! Ncyà bushùwà! Kàdi tudi beedìbwe ku cipimu, ne basangànyìbwe katùyì bujitu to.

88 Ciinè aci ncifwànyine kwenzeka dìbà kaayi? Kumpàla kwà kwisù kutòòkakù mu dindà. Nganyi waciimanyika? Teetàayibi kuciimanyika's. Bible mmwambè ne necyènzekè.

89 Kàdi lekèlaayi nwwàmbilèku, aci kacayàkulengakù Èkèleeziyà wa Nzambì udi ne mwoyi nànsha, twètù netwikalè bamanè kuya pa dìbà adi!

90 Pa nàнку, mulundà wanyi, tèèlejà. Piikalà cintu aci ciseemène nàнку awu, ne twètù tumòna mufundù ku cimanu, kakwèna cintu nànsha cimwè cìdì mwà kupangisha cintu eci bwà kwenzekaci mpindyewu to.

91 Àmèrikè mbamanè kumuyiisha, citàmbe-mfùkilu ncimanè kwenjiibwa, kàdi mbatungùnùke ànu ne kwenda biikàle bàCìdyatakaja.

92 Udi uya mu ditunga kampànda mwaba kansanga wenzamù ditàbuluja, ne upeta bantu makùmi ànaayi mu lumingu lujimà bàdi bakùdimùne mucìma; kàdi walùkilamù paanyimà pàa mbingu yisambòmbò, kùyì ubàpeta bànaayi to. Cijibajiba cyà kale cyà màyi aci bàkaadi balòbèlòbemù cyùme ne kuuma. Nzambì ùkaadi ne bantu bùngì kampànda bàdiYe musungùle. Ne pàdi wa ndekeelu mumanè kubwela, aci cidi cikànga ciibi pààkù kùmba kùjika.

<sup>93</sup> Dìbà adi kakùcyèna cìdì cishààle to ànu cilumbulwidi pùikalà luse lubèngùbwè ku maditàmbishi. Kàdi's ki twètù aba ku ndekeelu kwà njila.

Citàmbe-mfùkilu cìdì munkaci mwà kwenjiibwa, mbaCìsekèsèke ne baCyélùlwile. Nènku cintu cyà ndekeelu, Nzambi mmulwè mu Bukolè Bwèndè Sungasunga, mu Mwân'Èndè Munanga Sungasunga, bwà kukwàcila mudimu ku Èkèleeziyà Wendè, kàdi bóbò bàdi bamba ne “Nditèndeela dyà bakishi,” anyi ne, “ndyabùlù.” Cìkwàbò cìdì mwà kwikala cishààle ncinyì pùikalàci kaciyi cilumbulwidi? Kàdi's ki mufùndù ngwòwò ewu ku cimanu!

<sup>94</sup> Kàdi, pùikalaci pabwìpì nàнку awu, ne mulongeshi kanà yònsò mmumanyè ne Èkèleeziyà ùyaaya mu Dyambwibwa kumpàlà kwà dikènga dinène kubangadi. Nènku pùikalàbi ne cyòcì aci cikaadi pabwìpì nàнку awu, cifwànyine kwenzeka kumpàlà kwà dindà, kàdi netwàmbè bishi bwà Dyambwibwa? Dìdì pabwìpì menemene kutàmba aci! Kaa, Dìnà dyà Mukalenge dibèneshiibwe's wè! Dilwa dyà Mukalenge dikaadi pabwìpì. Mufùndù mmufùnda, ne mmufùnda mu Bible, ne tudi ne mwoyi too ne ku diwùmòna.

<sup>95</sup> Udiku, ku ditwishishà dyà dīyì dyànyì dyà mukana, mwà kwakidila Yesù Kilistò pa dībà edi anyi? “Nyingàlalaayi, nùbatiijiibwè,” mwàkambà Peetèlò, “muntu ne muntu wa kunùdì, mu Dìnà dyà Yesù Kilistò, bwà dilekelediibwa dyà mpèkaatù, nènku nenùpetè kupà kwà Nyumà Mwìmpè; bwalu mulayi wùdì kunùdì nwènù, ne kùdì bānà bèènù balela, ne kùdì aba bàdì kule. Bwalu kakwèna dīngà dīnà difila mwīnshì mwà Dyulu munkaci mwà bantu, dinùdì ne cyà kusungidiibwa ku dyòdì to.” Paùdì kùyi wa Kilistò to! Udi mufwànyine kwikala Méthodiste, Baptiste, mwena Mpenta, Nazaréen, mwena Kàtòlikè, udi mujìmine paùdì kùyi mwanjì kulwa wa Kilistò! Ne Kilistò ùdì ùbwela munda mwèbè, n'Dilediibwa dipyadìpyà ku Nyumà Mwìmpè. Mwakidilè dilòlò edi, patùdì tusambila apa.

<sup>96</sup> Ne mitù yènù miinyika. Ndi ànu ndikonka eci nùнку ewu, mbanganyi mwab'ewu bàdiku bamanyè ne cintu cinènè eci necyènzekè? Udi mwà kuya kalààlà tulù dilòlò ne mukajèèbè, kàdi mu dindà yèyè neikalè muyè. Nwènù, taatù ne maamù, nudi mwà kutwà bānà bèènù balela mishiku bwà kuyabò kalààlà, dilòlò edi, kàdi maalabà mu dindà bulààlu bukesè abu bùkaadi munda mùtupù. Nènku neùpwekè lubilu ne mùsèsèsù, bwà kujandula ne ncinyì cìdì cyenzèkèle Māndāmù Jones, yèyè mumanè pèndè kuya. Dyambwibwa dikaadi pabwìpì, Bible mmucyāmbè bitòòke tòò.

<sup>97</sup> Nènku mu disangisha edi, panùcìdì ne mpùngà apa, ànu bu balùmè bàà—bàà meeji, ne bakàjì bàà meeji, bwà cinyì kùyikù utèya macì ku dibìikila adi mu mwoyi wèbè, wamba



ne: “Mukalenge Nzambi, nguujèku ne Mwoyi wà Cyendèlèèlè awu.” Bwalu, piikalà nyumà webè mucikàle ànu mmwènenenu wa meeji à mu mutù, udi muswikàkàne ne buloba. Kàdi Nyumà wa Nzambi, udi mufumine mu Dyulu awu, ùbwela munda mwà mwoyi webè ne ùkupèèsha Nyumà Mwimpè, munda mwèbè. Pàdi dikèngà dinènè dilwa, Nyumà (Nyumà Mwimpè) ùdi wàlùkila kùdi Mufùki Wendè, ne wèwè uya Nendè. Nànsha wèwè mwikàle mutèndèleedi wa bìshi, kabyàkukùmbanakù to ànu kwòkò kwikàle Cintu kampànda muntwamu bwà kukwangata.

<sup>98</sup> Mbanganyi dilòlò edi, ne mitù yènù miinyika, kumpalà kwà Mukenji ewu eku, bàdi baswè kwela byanza byènù muulu kùdi Kilistò, wamba ne: “Nzambi, nguujèku ne Nyumà Mwimpè Webè. Nènku bu Wèwè mwà kulwa, ndi muswè kuya Neebè”? Nudikù baswè kwela byanza byènù muulu anyi? Nzambi ànùbènèshè, ànu myaba yònsò mu èkèleeziyà. Ànu byètù byà cyà bushùwà ebi, nkàmà yibidi, anyi bapite apu, yà byanza byela muulu.

<sup>99</sup> Mulundà wanyi ngènzàmpèkàatù, pawikalà kacya kùyikù mwànji kwitaba Kilistò to, udikù pa dîbà edi mwa kwela cyanza cyèbè muulu, wamba ne: “Mukalenge Yesù, ikàlàku naanyi luse” anyi? Nzambi àkubènèshè, inàbànzà. Nzambi àkubènèshè lwà apa, wèwè udi paanyimà pààpa awu. Muntu mukwàbò: “Mvùlùkèku ànu cyanààna, Mukalenge.” Nzambi àkubènèshè lwà apa nùnkù, lwà kwínshì eku. Mukalenge ikalè neebè. “Wamvùlukakù, Éyi Mukalenge. Mèsù àànyi mmáfume ku dikanguka. Ndi mfika ku dyumvwa ne pàmwàpa ndi mujikùle mwambè mündi mwena Kilistò kùkaadi ntàntà mule, kàdi kacya ncitukù mumanyè ne kwikala mulediibwe cyàkàbidi ncinyi to. Ncitungù mwanji kupeta Nyumà Mwimpè to.”

<sup>100</sup> “Ki bwà cinyi, muntu yèyè kàyì mulediibwe cyàkàbidi to, nànsha bìshi kààkubwelakù mu Bukalenge to, anyi kèna nànsha mwà kumòna Bukalenge to.”

<sup>101</sup> Udikù mwà kwela cyanza muulu, wamba ne: “Ikàlàku naanyi luse, Éyi Nyumà Mwimpè. Nènku pa Wàvwilà Èkèleeziyà, ùngangàtèku” anyi? Nzambi àkubènèshè, inàbànzà. Muntu mukwàbò wa ne: “Wamvùlukakù, Éyi Nzambi.” Àkubènèshè, mukalenge. Nzambi àkubènèshè, inàbànzà. “Wamvùlukakù, Éyi Nzambi.” Nzambi àkubènèshè apa, wèwè nsongàalùmè. Nzambi àkubènèshè kùdi aku, inàbànzà. Paanyimà apu, wèwè nsongàakàji, paanyimà apu. Ne wèwè paanyimà apu, inàbànzà. “Ikàlàku naanyi luse, Éyi Nzambi, pàndi mmòna ne mufundu wùdi ku cimanu apa. Ndi ne meeji bùngi bukùmbàne, bwà kwamba, bwà kumòna ne cidi cyambiibwè mu Bible, dilòlò edi, ne cidi ndyenzuluka dyà maalu-malonda.”

<sup>102</sup> Tukàadi ku ndekeelu. Kakwèna cintu nànsha cimwè cidi mwà kukwàcisha to. Cintu ciikalà mwà kubùtula buloba cidi mu byanza byà bantu babiipe.

103 Kùdi ànu ndambu mukesè cyanààna. Wèwè udi mufwànyine kwikala wa ndekeelu udi mulongolwela kulwa kùdi Kilistò. Pàdi wa ndekeelu awu ùlwa, cilumbulwidi cìdi cìdikùma; nkupangike cintu cimwèpelè, ncifwànyine kwikala wèwè. Udikù mwà kuMwakidila dilòlò edi patùcìdi bindile apa anyi?

104 Byanza bitwè ku makùmi àbiidi, makùmi àsàtù mbyediibwe muulu. Mpindyewu katwèna ne mwaba kaaba aka bwà kwenza dibìikila dyà ku cyoshelu to, bwà kufikisha bantu kumpàla eku, bwalu katwèna ne mwaba nànsha wùmwè to. Kàdi nènkulòmbè, cyà bushùwà, kaa, ikàlà ne meeji matòoke ne úteelejè dīyī dyà mukana dyà didimwija. Ikàlà ne meeji matòoke ne lòmba Kilistò, ànu mwaba wùdi musòmbè awu ne: “Mukalenge, ikàlàku naanyi luse, mèmè ngènzàmpèkààtù, ne ngaakidilèku kumpàlà kwà mèmè kusambuka dyàmwàmwa dyà cilàmbà cikùdika cyà ngàsà. Kumpàla kwà mèmè kujìmija ditùkù dyànyì dyà ngàsà ku dyanza dyà mpèkaatù, ikàlàku naanyi luse, Mukalenge,” ne Yèye neàcyènze.

Mpindyewu sambilaayi mùshindù awu pàndi nsambila pàmwè neenù apa.

105 Mukalenge mubènèshìbwè, tudi biimàne mu ngiikàdilù wa bwalu bukolè be dilòlò edi. Patùdi tubala Dīyī Dyèbè apa, ne bamanyè ne pa dībà kanà dyònsò bisanji mbifwànyine kukòbola nguumu, ne bisumbù bya misambu yà maja à bidùndadùndà nebìbangè kwimba *Pépi*, *Neebè*, *Nzambi Wanyi*, kàdi dībà adi dībà nedīikalè dimanè kupita, cilumbulwidi cimanè kudikùma. Missiles mmitùlùdikila. Kabùtù, mu ntàntà wa kilòmèètà ne kilòmèètà, ku binunu ne binunu byà kilò yà—yà makàndà à bòmbè yà mushindà àdi mwa kutangalaka pa buloba bujimà, ne bikwàbò, aci's ncifwànyine kuteemesha buloba bujimà mudilu. Ne cìdi mu byanza byà bantu babiipe. Ne Bible mmwambè ne ki mùshindù wenzekàci. Ne tudi tumòna mufundù ku cimanu.

106 Éyi Mukalenge Nzambi, ncyèna mukùmbàne bwà kuteeta kutwàla Mukenji bu ewu kùdi cisàmbà to. Nènku ndi ngumvwa mùndi mukesè, pàndi mwimane mwaba ewu apa, bwà kuteeta kukwàta cyena-bwalu bu eci, kàdi swàku ùmfwilè luse bwà cyànyì citùpa cyà kubènga kwikala mukùmbàne bwà kucyènzà. Kàdi nànsha nànu, kuumukila munda mwà mwoyi wànyì, ndi nKulòmba bwà kupwekeshamù Dīyīisha edi, mùshindù w'Udi muswè kudibweja awu, munda mwà myoyi yàbò, bwalu ndi bulelèlè mmòna dībà diseemena. Nènku ikàlàku ne luse, Nzambi, ne sùngilàku muntu ne muntu, ne ùbùjèku ne Nyumà Mwimpè. Ne biikalèku bānà Bèèbè, bajingila kùdi bwimpè bwà Bunzambi Bwèbè, ne bàpetèku dikùbiibwa dyà kùdi Mukalenge Yesù.

107 Bwalu, ditùngà dyètù kadyèna ne dikùbiibwa to. Tùvwa beelè meeji ne ki citùvwà. Ki mùvwà kàbidì Bukalenge bwà beena Baabùlònà bwèla meeji, kàdi, dībà dyònsò, kùvwa ditùnga

dyà beena lwonji diikàlè dikwàta mudimu. Nènku kùwva ditúnga dyà lwonji dikwàta mudimu, too ne mpindyewu tudi bamanyè ne bàdi kumutù kwètù, ne twètù tudi ku bukòòkeshi bwàbò.

<sup>108</sup> Mukalenge, Èkèleeziyà ùdi ku bukòòkeshi Bwèbè. Bòbò nebàbutulè; kàdi Wèwè newàngate Èkèleeziyà Webè. Éyi Mukalenge, twàngàtèku mu bukùbì Bwèbè, dilòlò edi. Ne tùbènèshèku bwà bwalu bwà Yesù; ne mu Dìna Dyèndè mmutùdi tulòmba nùnku. Amen.

<sup>109</sup> Ànu bitùùlùbitùùlù, katancì kakesè. Ikàlaayi mu kaneemu.

Bitùùlùbitùùlù ne musangeelu wònsò Yesù ùdi  
ùbìikila,  
Ùkubìikila wèwè ne . . .

Patùdi twimba mpindyewu apa, dibalùlwilè bwalu ne bwalu.

. . . ku Ciibi Yèyè mmwindile ne ùtàngila,  
Ùkutàngila wèwè ne mèmè.

Alùkilà kumbèlu . . . (Penyi? Bànda, bànda  
bicolè.)  
Nwènù bàdi bazengèle, alùkilaayi kumbèlu;  
Ne mwèndè mwònsò, ne musangeelu wònsò,  
Yesù ùdi ùbìikila,  
Ùbìikila, Éyi ngènzàmpèkààtù wa yààya,  
alùkilà kumbèlu!

[Mwanèètù Branham udi wimbila mu matàma  
*Bitùùlùbitùùlù Nè Kalolo Kònsò—Muf.*]

<sup>110</sup> Kaa, kí ncifwànyìnekù kwikala cikondo cilenga cyà dikèmà bwà kwenzekaci mpindyewu mene anyi! Kaa, s'bidì ànu bîmpè, díbà kanà dyònsò didìYe mudìlongòlòle adi. Amen! Ndi ne disànkà dyàbùngì dyà kuMumanya. Ndi ne disànkà dyàbùngì dyà ne mubidi wà kale wà mutekètàngàne ewu, wùdi wènda wùfùbidila pànwapa ewu, newùshintulukè mu katancì, mu mubùnyi wà dísù. Nèngààlukilè cyàkàbìdì nsongààlùmè, bwà kwikala ne mwoyi kashidi.

Bakùlàkàjì nebìikalèmu bansòngà bwà  
kashidi,  
Bashintùlùdìibwe mu katancì kaa díbà;  
Kabàyi mwà kufwà, nebìimanè mu  
difwàngana Nèndè,  
Nebàkènkè kutàmba mitootò ne díbà.

Mpùngà kaayìpu's wè! KùMudyombòlù to.



mu nkwasá ùdì musòmbe dilòòlò edì awu, bàvwa batèèlèje Èvànjeeliyò, kàdì bafwè, bàdì mu mwaba wà dikèngeshiibwa dilòòlò edì, mùshindù mwinè wùdìbo bafwànyìne kunanga bwà kwangata nkwasá ùdì musòmbe awu; díbà's dikaadi dipìte bikolè mpindyewu.

<sup>116</sup> Mukalenge, Wèwè Wàkafùka Maulu ne buloba, Wèwè Wàkatùma Mukalenge Yesù mubènèshiibwe pa buloba apa awu; ne munda Mwèndè mùvwa musòmbèle kaabujimà kàà Nyumà. Ne Wèwè ngwákamba, ku mishikù Yèndè ne: “Mémè ndi Mwonji wà mvinyò, nwènù nudi matàmbà. Mwonji wà mvinyò kawùtu wùkwàma mamuma mu Wòwò mwinè to, kàdì matàmbà ngàtù àkwàma mamuma.” Ndi ndòmba, Nzambì, bwà Wèwè kuDimwèneshakù dilòòlò edì, munkacì mwètù, bwà bantu aba bààmònakù mwà kumanya ne Mukenji wáfùmu ku diyishiibwa ewu, mmufùmìne Kùdi, ne Udi utùdimwija bwà tùdilongòlòlè, ne matùkù à ndekeelu àkaadi pabwìpi.

<sup>117</sup> Kùdi mwà kwikala babèèdì basòmbe kaaba aka, Mukalenge. Bàpèèshèku dikànkamijiibwa, bwà bààmònakù mwà kwondopiibwa, bwalu tudi tulòmba nùnkù bwà butùmbì bwà Nzambì. Mpindyewu, Mukalenge, patùdì tudìlekelela Kùdi apa, bu Èkèleeziyà wa Nzambì udi ne mwoyi; bu mùdìbi ne, mùndì ncinka, cyanza cyònsò mwab'ewu ncyediibwè muulu. Nènku nènKulòmbèku, dilòòlò edì, Mukalenge, bwà kutwènzèlakù cintu kampànda cyà pabwàci. Nènku enzàku mpindyewu mene bwà bantu aba bààmòna mwà kudìlekelela mu mùshindù wà Nyumà Mwìmpè mufwànyìnekù kukwàcila mudimu ku bòbò, ne diitabuuja dyà mùshindù awu, ne bwà mémè mwinè ngààmònakù mwà kudìlekelela Kùdi, ne Wèwè wamòna mwà kukwàcila mudimu ku mapà Èbè ne kuDìjaadika munkacì mwètù; ne, nkufwànyìne kwikala beenyi munkacì mwètù. Tudi tulòmba mu Dìna dyà Yesù. Amen.

<sup>118</sup> [Katùpà kàà mukàbà wà mèyi munda mutupù—Muf.] . . . bwalu Yèyè ùtu misangu yònsò ànu ùleeja luse kumpàlà kwà cilumbulwidi. Nèndombè ànu bambi bwà kushààlabò mwaba awu, ne bàsambilè. Tùsambilàayi.

<sup>119</sup> Nènku mpindyewu, nangàrangà, ngàayiishì, nènku ndi—ndi njinga ànu kunùlòmba pàmwàpa nwènù bàdì kumpàla eku aba, anyì kwònsò kunùdì nusanganyiiibwa aku, bangàayi ànu kwamba eci. Bible ùdì wàmba nùnkù: “Yèyè ùdì Mwakwidi Munène udi mwà kulengiibwa kùdì dyumvwa dyà mateketa ètù.” Èè, díbà adi, piikalàYe Mwakwidi Munène uvwakù makèèlèlè awu, Yèyè udi umwèumwè awu leelù ewu; díbà adi ngenzèlù Wèndè umwèumwè uvwaYe mwenzè makèèlèlè awu, Yèyè neenzè leelù ewu piikalàYe umwèumwè awu. Ncyà bushùwà anyì? Pa nànkù piikalàYe mwà kulengiibwa mpindyewu, wèwè Mulengè ne dyumvwa dyèbè dyà mateketa adi, lekèlaaku Yèyè àkwandàmùnè.

120 Anji elààyi bì meeji tǔng, dǐbà dyàkiimanàYe mu batèeleji bu aba nǔnku ditùkù kampànda, kwàkalwa muntu kampànda, dyèndè ne Peetèlò, anyi dǐnà dyèndè ùvwa n'Simonà. Ki Yèyè ne: “Dǐnà dyèbè n'Simonà. Udi mwànà wa Yona. Kàdi, kuumukila ku mpindyewu ewu, neùbìikidiibwè ne m'Peetèlò.” Wàkalwa nganyi? Mupostòlò munangiùbwè's.

121 Filipò pàakasanganàye Natànàèlè, ne kulwayè, Yèyè ne: “Mònaayi mwena Izàlèlèlè mwena munda mùdi kamùyi lubombo,” mu ngaakwilù mukwàbò ne, “mwena Kilistò, muntu wa meeji matòòke.”

Yèyè ne: “Wàmmanyi munyi, Laabi?”

122 Yèyè ne: “Kumpàlà kwà Filipò kukubiikilayè, paùvwa mwĩnshì mwà mucì apu, Mèmè mvwa mukumòne.”

123 Mukàji uvwa ne mashi àlwa munda awu wàkapàtuka. KutàngilaYè batèeleji.

124 Bàvwa bàdyàmbila ne byenzedi Byèndè abi bìvwa byà kùdi dyabùlù, nènku bààkamba mu mwoyi wàbò ne: “Yèyè m'Beelèzèbùla.” Ki Yèyè kujingulula meeji àbò. Ncyà bushùwà anyi?

125 Yèyè ne: “Ncyèna ngèza cintu nànsha cimwè to pàdi Taatù kàyi mwanji kuciNdeea dyàmbedi nànsha. Ne byenzedi bìndi Mèmè ngèza, nenùbyènzè pèenù.” Pa nànkù bìdi bikèngela kwikalaYè nànkù, piikalàYe ùkwàta mudimu mu Èkèleeziyà Wendè, bwalu aci n'Dìyi Dyèndè.

126 Mpindyewu ndi muswè kunùkonka. Piikalàbi ne mu batèeleji aba emu, nànsha bantu bàbìdi anyi bàsàtù, Mukalenge neènzè ne bóbò biikalè ne diitabuuja dikumbàne bwà kulengabò civwalù Cyèndè aci, ne Yèyè neàpinganè mu Nyumà Wendè ne kwenza maalù ànu menemene mwàkenzàYe pàvwaYe pa buloba apa amu, nwènu bònsò nudikù bafwànyine kwikala basànkishiibwe bwà kuMwitaba bu mwondopi wenù anyi? Nudikù bafwànyine kwenzà nànkù anyi? Ambàayi ne: “Amen,” panwikalà bafwànyine kwenza nànkù. [Disangisha didi dyàmba ne: “Amen.”—Muf.] Anyishèku Àcyènzè, ki disambila dyanyi. Mpindyewu bu nwènu ànu mwà kusambila. Nènku panwikalà . . .

127 Mbanganyi bàdi bàsaamà mwab'ewu bàdi baswè kwondopiibwa, elàayi byanza byènu muulu. Ànu myaba yònsò's, èyo, babèèdi bàdi baswè kwondopiibwa abu.

128 Mpindyewu, kwòkò muntu kanà yònsò mu citanda emu ùndi . . . Ncyèna mumanyè muntu nànsha umwe ùndi mèmè mutàngile to.

129 Ngeela meeji ne ewu n'Rosella udi musòmbe apa ewu, mwànà wa bakàji mutekète uvwa kanwàyi wa maalà a kapyà awu, wàkabiikidiibwa mu disangisha mwaba kampànda, ùvwa kanwàyi wa maalà à kapyà, ne bangàngàbukà

bamwelè làà awu. Yèyè mukàjì awu, pààkabiikidiibwàye kùdi Mukalenge, nsongààkàjì awu mmumanyè ne kacya ncivwakù mwanjì kumumòna anyì mumumanyèku to. Kàdi Mukalenge wàkamwambila byònsò bìvwà bitàngilà mwoyi wèndè ne ngiikàdilù wèndè, ne kumwambila ne ùvwà ne cyà kusàngàla. Kàdi's ki Yèyè ewu dilòòlò edi, cileeji cyà ku ngàsà wa Nzambi. Kanwàyi kàà maalà, mu mùshindù wa ne ngàngàbukà ne ngàngàbukà yònsò wàkamwela làà, nànsha mene beena Alcoholics Anonymous. Yèyè ndi mumumanyè.

<sup>130</sup> Kàdi, pa kuumusha awu, ndi mutwishiiibwe menemene ne mwanèètù wa balùme udi muntàngìle ewu, udi musòmbe apa mene muvwàle nkooçi wa cisengàsengà ewu, yèyè mmwanèètù utu utùtwàdila bilòngò awu. Ngeela meeji ne ncyà bushùwà. Ncyèna—ncyèna mwà kuvùluka dìnà dyèndè mpindyewu to. Ùvwà mulwè kwànyì kumbèlu àbìdì aa, balwè ne Mwanèètù Boze; Shultz, Mwanèètù Shultz.

<sup>131</sup> Pa kuumusha aci, mvwa ngeela meeji ne mvwa mumòne Mwanèètù Fred Sothmann kùkaadi katanci kakesè cyanààna, mwaba kampànda mu citanda emu, kàdi ngaapù mwoyi ne kùvwà nkwèpì mpindyewu. Nànsha nànkù, ùvwà nyéyè, ùdi apa mwaba kampànda.

<sup>132</sup> Kàdi ncyèna—ncyèna mumanyè munga muntu to. Kàdi Nzambi mmunùmanyè nwènù bònsò. Bu wèwèku ànu mwà kusambila ne kulòmba Nzambi, kuteeta diitabuuja dyèbè.

<sup>133</sup> Nènku muntu nànsha umwè kàtentemukikù mpindyewu nànsha. Ikàlaayi mu kaneemu kàà menemene bwà tusunsa tukesè tùdi tùlondà etu. Mpindyewu, *Itàbùùjà Nàka*, bu nwènù mwà kuswà. Nènku ànu ne kaneemu kààbùngì ne mwènù pèènu mwònsò bwà tusunsa tukesè cyanààna, ne basòmbe ànu pòlàà.

<sup>134</sup> Anjì elààyibì meeji tũng, Kilistò mmucilayè. “Mu katanci kakesè emu, ne bàà pa buloba kabààkùMmona kàbidì to; kàdi nwènù nenùMmònè, bwalu Mèmè. . .” (“Mèmè,” kàyi mukwàbò to. *Mèmè* mmupinganyi muleeji muntu.) “. . .Mèmè nêngiikalè neenù too ne ku ndekeelu kwà buloba. Bintu bìNdi ngèza, nenùbyènze, nwènù pèènu.” “Yesù Kilistò umwèumwè awu makèlèlèlè, leelù, too ne kashidi.” Aci ncilelèlèlè anyi? Bìkèngela ciikalè cilelèlèlè's.

<sup>135</sup> Èè, ndi ne kusàkidila kwàbùngì kùdi Mukalenge. Ndi mufwànyine. . . Nudi mwà kujuula mitù yènù panwikalà baswè.

<sup>136</sup> Apa mene lwà mu ditumba emu, kùdi inàbànzà kampànda musòmbe mu ditumba emu. Mmuntu mukàjì wa bafiike. Inàbànzà, ncyèna mukumanyè to. Nzambi mukumanyè bulelèlè. Kàdi kùdi Bukènkè abu ànu kumutù kwà mukàjì awu mpindyewu. Yèyè ùdi ne. . . Bu Mukalenge mwà kunsokolwela cìdì lutàtù lwèbè, ne cyùdì usambidila aci, newitabuuje ne m'Mukalenge Yesù bwà kukukwàcisha anyi? Wèwè udi ne cyà

kwikala mu lutàtu, anyì cintu kampànda cyûdi ujinga, bwalu Bukênke abu's mbwòbù aabu.

<sup>137</sup> Nwamònu's, balundà bàanyi, nudi nwênù nwamba ne: "Èè, mêmè ncyèna mBùmòna to." Bidi mwà kwenzeka bwà kùyi mufwànyine kuBùmòna to. Ndi muBùtàngìle buludì. Nwamònu anyi? Wèwè udi wamba ne: "Èè, Mwanèètù Branham, piikalàbi ne wèwè udi mwà kuBùmòna ne byumvwilu byèbè, nànsha mêmè pàanyi's." Kaa, to.

<sup>138</sup> Pòlò wàkamòna Cyòci aci, Yesù wa mu mmwènèkelu wa Bukênkè awu, kàdi bàvwà nendè abu kabàakaBùmòna to. Nwamònu anyi? Beena meeji bàakamòna Mùtootò, Bukênkè bwàkabàlombolà abu, kàdi muntu mukwàbò nànsha umwe kàakaWùmòna to. Cidi ànu bwà bàmwè. Mmapà.

<sup>139</sup> Mukàji ewu ùdi ne dîsaamà dyà mutù wà kapàla. Ncyà bushùwà. Wèwè udi kàbidì ne dîsaamà dyà mwoyi. Ncyà bushùwà menemene. Tèèlejà, dîna dyèbè didi ne, bàtu bàkubùikila ne "Essie." Um-hum. Dîna dyèbè dyà munda ng'Upshire. Um-hum, um-hum. Utu musòmbèle mu Mùsèèsù wà Cleveland Nord. Mwaba wùdi musòmbèle nnombà 1264. Ncyà bushùwà menemene. Webè. . . Wàlengi Cintu kampànda, inàbànzà. S'udi mumanyè ne kí mmêmè ùdiku mulngè awu to.

<sup>140</sup> Nsongàakàji udi musòmbè ku luseke lwèbè aku awu, ùdi ùsambila pèndè. Kàdi ùdi ùsambidila muntu mukwàbò, ne mwinè awu mmamwèbè, ne yèyè ùdi ne cintu cìmutàcisha mu bisùlùsùlù. Ne wèwè udi ne bulongo ne mukàji ewu. Wèwè udi mukàj'a mwanèndè. Ne dîna dyèbè m'Margaret. Ncyà bushùwà. Kàbidì nudi basòmbèle mwaba wùmwè. Ndi mukumòna wenda ulwa, ne ubwela.

<sup>141</sup> Udi wela meeji kaayi bwà bwalu abu, mukalenge, muntu udi ulonda udi musòmbè mwaba awu awu? Udi witabuuja Yesù Kilistò ne m'Mwànà wa Nzambì anyi? Udi witabuuja anyi? Bu Mukalenge mwà kunsokolwela lutàtu lwèbè, nèuMwitàbè anyi? Udi ne dîsaamà dyà cifu. Ncyà bushùwà. Piikalàci cyà bushùwà, juukilà kuulu. Mmwòmò menemene. Wèwè utu muiishi.

Mu bushùwà bwà bwalu, nudi nwamba ne: "Mmutàngìle ku bilàmbà byèndè byà bwambi."

<sup>142</sup> Eyo, pa kuumusha aci, muntu ùdi mwa kwela meeji ne wèwè udi Presbytèrien, kàdi wèwè udi muiishi wa beena Mpenta. Ncyà bushùwà. Amen. Dibìnduluka dyèbè adi ki didi dilelè cyùja cyèbè aci. Cyàjikì. Alùkilaaku kwèbè ùmwè bîmpè, mwanèètù wa balùme. Amen.

Ikàlà ne diitabuuja mu Nzambì. Kwèdi mpatà to.

<sup>143</sup> Udi wela meeji kaayi, wèwè ùdi musòmbè apa ewu? Èyowà. Uh-huh. Udi witabuuja anyi? Udi witabuuja ne mêmè ndi musadidi wa Nzambì anyi? Anyi, udi ujinga cintu kampànda cyà kùdi Nzambì. Bu Nzambì mwà kunsokolwela cyûdi ukèba,



newitabuuje ne Citambe-mfukilu cidi munkaci mwà kwenjiibwa anyi? Udi ucitabuuja, ànu menemene mùdi Yesù mufwànyine kucyàmba anyi? [Mwanèètù wa bakàji awu ùdi wàmba ne: “Ne mwoyi wanyì wònsò.”—Muf.] Ne mwoyi wèbè wònsò. Udi ne cyùjà, ne cyùjà aci cidi mu cimònò mwèbè amu. Ncyà bushùwà. Kàbidì udi ne disaamà dyà cifu. Ncilela kùdi disaamà dyà dibìnduluka. Ncyà bushùwà. Uh-huh. Dìna dyèbè ng’Eva May. Readman ki dìna dyèbè dyà munda. Udi musòmbèle mu mùsèèsù kampànda, mu mùsèèsù wa 13 Wesete nombà 1378. Aci’s mmwòmò menemene.

Bwà wèwè kumanya ne ndi musadidi wa Nzambi, udi musòmbè apu awu mmwanèèbè mukesè wa bakàji. Wèwè udi ukèba bwà bàmusambidilè. Mwànà wa bakàji mukesè awu ùdi ne mashi àlwa munda, ne àdi amupàtuka pàdiye ùsaluka anyi ùdila bikolè menemene. Aci cidi EMU MMÛDÌ MUKALENGE WÀMBA.

Mwànà mukesè wa balùme awu mmwanaàbò. Ncyà bushùwà. Mwànà mukesè wa balùme awu, kàbidì, wèwè udi ukèba bwà bàmusambidilè. Mmutàcishiibwe kùdi cikùtàkànyì, ne yèyè pèndè, mmujimije bujitu bwàbùngì ànu matùkù makesè mashààle aa. Ki mmwòmò anyi? Aci cidi ng’EMU MMÛDÌ MUKALENGE WÀMBA.

<sup>144</sup> Mukàji wa batòòke udi musòmbè ku luseke lwèbè awu, mbimwèke bu ne mmutàcishiibwe kùdi cintu kampànda. Udi witabuuja anyi, mwanèètù wa bakàji? Udi witabuuja ne Nzambi mmutùme Mwàn’Èndè, Yesù Kìlistò, bwà kwambila lukòngò lwà bàà Bisàmbà byà bendè ne Yèyè ùlwalwa katààtaakà anyi? Udi ne disaamà dyà kajilu didi dikutàcisha, ne disaamà dyà dila dinène, kàbidì udi ubìnduluka. Kwèna wa mu cimenga eci to, nànsha wèwè. Udi wa mu Detroit. Nombà wèbè, wa mwaba wùdi musòmbèle, ùdi 12134 Fandler Steet. Ncyà bushùwà. Detroit, mu Michigan. Wèwè udi mwena Italie. Dìna dyèbè udi Viola P-o-l-o-m-... Polomba. Uh-huh. Ikàlà ne diitabuuja mu Nzambi, ne petà cyùdi ulòmba aci.

<sup>145</sup> Nudi nwela meeji kaayi, patùdi tupweka mu nùnkù ewu? Nudi nwitabuuja ne mwoyi wènu wònsò anyi?

<sup>146</sup> Kàdi wèwè, inàbànzà mutekète udi musòmbè apu awu? Udi witabuuja ne mwoyi wèbè wònsò anyi, inàbànzà mutekète udi ku ndekeelu aku awu? Èè, yònsò wa kunùdi, kakwèna bwalu to. Udi wela meeji kaayi, wèwè awu, ku luseke lwèndè menemene aku? Udi witabuuja ne mwoyi wèbè wònsò anyi, maamù mutekète udi musòmbè, muntàngile wàwa? Udi wela meeji kaayi bwà bwalu abu? Udi witabuuja ne Mukalenge Yesù mmufwànyine kukwondopa mijilu yidi mikùle ayi anyi? Udi witabuuja anyi? Pàmwàpa udi mufwànyine kwela meeji aa, udi mufwànyine kutàmba kwitabuuja ànu bu mèmè mwà kukwambila ne bàyeebè ùvwa ne disaamà dyà maci. Ùvwa

ùkèba bwà bàmusambidilè. Aci's ncyà bushùwà menemene. Uhhuh. Mpindyewu udi ungiitabuuja anyi? Kùvwa ucyùmva to, kumpàla. Cyôci aci cyénji bu cyàkutàbuluji, ku cintu aci, bwalu wàpeci dyondapa dyèbè díbà adi mene.

147 Wèwè awu wedi cianza muulu, wèwè udi mumulondèle awu, inàbànzà. Udi wela meeji kaayi bwà bwalu abu? Udi witabuuja ne Nzambi mmufwànyine kukusàngaja anyi? [Mwanètù wa bakàji awu ùdi wàmba ne: “Ndi mumanyè ne Ùdi mwà kunsàngàja.”—Muf.] Udi muswè anyi? Èyo, díbà adi binyòkà byèbè abi nebikuumùkè. Udi mwà kwitabuuja anyi? Huh?

148 Uvwa wela meeji kaayi, mukalenge, wèwè wanyùngìshì byanza awu? Udi witabuuja ne Nzambi mmufwànyine kukwondopa ku disaamà dyèbè dyà mwoyi adi, kukusàngaja anyi? Udi witabuuja ne Yèyè neàkwondòpè anyi?

149 Wèwè, udi musòmbe, udi mumutàngile kwàka wàwa, udi pèèbè witabuuja anyi? Udi muswè Nzambi. . . Uvwa pèèbè ne disaamà dyà mwoyi. Kí mmwòmò anyi? Èyowà. Kàbidì, uvwa ne disaamà dyà nsùkaadi. Ncyà bushùwà. Udi witabuuja ne Nzambi neàkusàngàjè anyi? Nàнку udi mwà kucipeta.

Kanwènaayi nwitabuuja anyi? Ikàlaayi ne diitabuuja mu Nzambi!

150 Lwà kwínshì eku ncinyi? Wèwè, mukalenge, udi musòmbe pààpa nàka ku ndekeelu kwà cibàsa awu aku, udi witabuuja anyi? Bivwa bikèngela wèwè kwitabuuja. Wafùmu ku dyondopiibwa. Ùvwa ne makàsà àkusaama, kí mmwòmò anyi? Udi witabuuja ne Mukalenge Yesù. . . Kadi wèwè udi usambidila muntu mukwàbò mpindyewu, mmwanèènu wa balùmè, ne yèyè awu ùdi mu Wisconsin. Mmufùme ku dipandiibwa bisùlùsùlù. Cyàbibìdi cyàbì ncyumùshìibwe. Ncyà bushùwà. Udi witabuuja anyi? Nàнку udi mwà kupeta cyùdi ulòmba aci.

Kaa, Dìná dyà Mukalenge dibèneshiibwè's wè!

NèmMutùmbìshè, nèmMutùmbìshè,  
Kutùmbìsha Mwànà wà mùkòòkò mushipa  
bwà bangènzàmpèkààtù;  
Mupààyi butùmbì nwènù bantu bònso,  
Bwalu Mashi Èndè mmasukùle dikeji dyònsò.

151 Mukalenge mubèneshiibwe, netùKumònè díngà ditùkù ulwa mu Maulu mwàmwa. Tudi bamanyè ne Wèwè udi kaaba aka mpindyewu mu Mubidi wà nyumà, Udi muDìleejè patòòke menemene kutùdì. Bàà pa buloba kabèèna mwà kubala aci to, Mukalenge. Katwèna nànsha batèkèmène ne bàdi mwa kucibala to, bwalu Wèwè wákamba ne: “KabààkuMmòna kàbidì to.” Kadi tudì bamanyè ne Wèwè udi ne bàna bàdi mwà kuKumòna. Twètù tudì ne bàna bàdi baKumanyè. Ne tudì ne kusàkidila bwà bwalu abu.

<sup>152</sup> Nènku tudi tulòmba mpindyewu bwà Wēwè kutàmbakana eku ne eku mu citanda emu, ne Nyumà Mwímpè munènè awu, ne kwondopa mubèèdi yònsò udi mwab'ewu. Mpindyewu ewu mene Dyǎngàcìlaaku butùmbì, Mukalenge. Swâku bwà bantu kabàsòmbiku bu bafwe to, kàdi enzaku bwà bàjuukè pânshi ne bàkênkè, ne—ne bafile butùmbi ne luumu kùdi Nzambi. Mu Dîná dyà Yesù.

<sup>153</sup> Nwênù baMwiitàbùùje, juukilàayi kuulu nùMupè butùmbi ne mwoyi wènù wònsò. Ne sànkàayi mu Mukalenge Yesù, bwalu Yéyè ùdi wòndopa muntu ne muntu wa kunùdi mpindyewu, bwà butùmbi Bwèndè bunène bwà buNzambi. Mukalenge ànùbènèshè. Amen.



*MUFUNDU KU CIMANU* LUA58-0108

(The Handwriting On The Wall)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisàatù dilòòlò, matùkù 8 à ngondo wa kumpala, cidimu cyà 1958, ku Lane Tech High School mu Chicago, Illinois, U.S.A. Ndyumusha pa mukaba wa mêyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)